

Date – 08/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. New Delhi-a cham mek Minister Pu F. Rodinglana'n Union Minister 3 hmuin Mizoram mamawh hrang hrang a sawipui.
2. Sorkar laipuiin Mizorama Helicopter service mek pakhat bakah a dang pakhat pek belh a tum.
3. Khawvel pum huap thiam thila inelna, 'WorldSkills Lyon 2024'-ah Mizo thalai pahnih an tel dawn.

<><><>

COMMERCE MINISTER

New Delhi-a cham mek Minister Pu F. Rodinglana chuan Union Power Minister, Manoharlal Khattar-a leh New & Renewable Minister, Pralhad Venkatesh Joshi-a te bakah Food Processing Industries Minister, Chirag Kumar Paswan-a te hmuin Mizoram mamawh hrang hrang a sawipui.

Union Power Minister Pu Manohar Lal Khatta-a nen an inkawmnaah Pu F. Rodinglana hian kawlphehtha pek chhuahna hrui leh power sub-station tihchanglungna tur Central Ministry-in a pawmpui tawh, bawhzui loha a awm avanga pawisa la pek chhuah chungchang thlenin Union Power Minister hian heng sumte hi an pek chhuah tur thu a lo hrilh a. Ministry of Power-in Hydrel Project lian tham siamna tur scheme thar a duan chu chhawr tangkai turin central PSU te nen thawkhua Project theh lut vat turin Union Power Minister hian a lo hrilh bawk.

New & Renewable Minister nen an inkawmnaah Pu F Rodinglana hian kawlphehtha hmanga intodelh chu Mizoram sorkar policy lian ber a nih avangin hydrel project siam tur Mizoram sorkarin a buaipui mekte MNRE hnuaia scheme hmanga tihpuitlinsak turin Union Minister hi a ngen a, Pu Pralhad Joshi-a hian heng small hydrel project te tihlawhtling tur hian MNRE-in a puih tur thu a lo hrilh a ni.

Pu F. Rodinglana hi Food Processing Minister, Chirag Kumar Paswan-a chenna inah lengin, Mizoram food processing industry te tiliana tichanglung tura hma lakpui turin a ngen a. A bikin Mizorama thlai tha em em leh hnianghnar tak - sawhthing, aieng leh hmarcha sawngbawlina kawngah Food

Processing Industries Ministry puihna a ngen a. Union Minister hian project engemawzat siama theh lut tura chahin, a lo bawhzui tur thu a lo hrilh a ni.

NEW Delhi-a a cham chhung hian Pu F. Rodinglana hian Department of Economic Affairs, Asian Development Bank bakah C&I leh Power sector hnuaia Ministry hrang hrang official liante hmu bawkin Mizoram sorkar hmalakna kal mekte bawhzuiin chak zawka tihpuitlin a nih theih nan a nawr a ni.

<><><>

OPERATION GINGER

Horticulture Department ‘Fehchhuah Runpui’ chu Hnahthial District-a khaw hrang hrangah thla hlui ni 16 atang khan kalpui tan niin zawhfel thawkhat a ni tawh a. Khaw 26-a Sawhthing chîngtu mi 550 hnenah training pek a ni.

Hnahthial district chhungah hian Sawhthing chîng in-report mi 1,812-in Sawhthing quintal 5,900 vel an chîng a; harsatna a awm loh chuan quintal Sing 4 vel bawr thar tura beisei a ni.

Fehchhuah Runpui, ‘Operation Ginger 2024’ hi District Horticulture Officer, Pu Lalthakima leh Asst. District Horticulture Officer, Pi Rosalind Lallawmzuali te kaihhruainaa neih a ni a; sawhthing tâm ven dan leh enkawl dan inzirtir a ni. Hnahthial District chhung-ah kumin hian ram hectare 713.7-a zauah sawhthing chin a ni a. Sawhthing chin tam ber hi ‘Thînglaidum’ leh ‘Thîngpui’ a ni. Cherhlun khuaah chhungkaw 196-in Sawhthing chingin Darzo khuaah chhungkaw 189 te’n Sawhthing an ching a, anni khaw hnih hi Hnahthial Dist.-a sawhthing ching tam khua an ni.

Sawhthing tâm hri hian khaw tam taka sawhthing chingtute tibuai viauin, a tâm hri bakah a eichhetu pangang leh tho lung hmuh tur a tam viau bawk niin kan Corr. chuan a sawi a. Sawhthing la tawih nasa lo mah se a hnah engin a bawm hneh tawh hle tih kan Corr. chuan a sawi bawk.

Operation Ginger 2024-ah hian Sawhthing enkawl dan leh a kah dan bakah a chi chiah dan te uluk takin inzirtir a ni a, mamawh zual tan sawhthing tâm enkawlana atan society-te hnenah damdawi leh sprayer te pek a ni bawk.

<><><>

HELICOPTER

Sorkar laipui Ministry of Home Affairs (MHA) hotute chuan Mizorama Helicopter service mek pakhat bakah a dang pakhat pek belh an tum tih Adviser to CM (Technical) Pu H. Ginzalala an hrilh.

Champhai North bialtu MLA Pu H. Ginzalala hian tun kar chho khan Delhi-ah sorkar laipui dawrin Mizoram mamawh hrang hrangte a thlen a. Chief Minister Pu Lalduhoma’n Mizorama Helicopter service changlung leh tam zawk a awm theih nana hma a lo lak tawhnate bawhzuiin MHA leh Civil Aviation hotute a kâwm a; MHA hotute’n Helicopter service dang pakhat pek belh an tum thu leh Mizoram sorkarin lehkhah tihfel ngai la awmte a tihfel hunah tender theih a nih dawn thu an lo hrilh a ni.

Pu H. Ginzalala hian Ministry of Road Transport & Highways Minister, Nitin Gadkari-a hmuin, Champhai Khankawn atanga Kanan Veng inkar kawngpui chungchang leh Mizorama NHIDCL hmalakna hrang hrangte a sawipui a. Department of Agricultural Research & Education Secretary, Dr. Himanshu Pathak, Indian Council of Agriculture Research (ICAR) director

general chu Lunglei, Champhai leh Saitual District-a Krishi Vigyan Kendra (KVK) din chungchang a sawipui bawk.

Pu Ginzalala hian Ports, Shipping and Waterways minister Sarbananda Sonowal-a leh Inland Waterways Authority of India (IWAI) Chairman, Vijay Kumar-a te pawh a kâwm a, Mizorama lui hmanga inkalpawhna tura ruahmannate a sawipui a ni.

<><><>

RUN FOR HEALTH

Hrisel pawimawhna leh HIV (AIDS) laka fihlim tura inzirtirna pakhat, ‘Run for Health (Marathon)’ chu nimin zing khan Lawngtlai DC, Cheemala Siva Gopal Reddy-a’n a vailiam.

A huhova tlan hi Mizoram State AIDS Control Society (MSACS) leh Government Lawngtlai College Red Ribbon Club tang dunin an buatsaih a ni a; Lawngtlai Bazara Areopagy-ah tlan tanna hun hman a ni a. Lawngtlai DC chuan, hriselna chu thil hlu tak a thawha thawhchhuah ngai a ni a, rilru leh taksa hrisel tha tak nei turin mi tinin theitawp chhuah a ngai a, a ti a. Thangtharte zingah hriselna atana taksa sawizawi thin an tlem hle nia a hriat thu sawiin, hriselna tel lo chuan eng hna mah a thawh tak tak theih loh, a ti a. Hriselna tha nei tura uar zawka taksa sawizawi kawnga tan la thar turin mipui a sawm a.

Sawrkar laipui pawhin hriselna a ngai pawimawh hle a, kawng hrang hrangin hma a la mek, Lawngtlai DC chuan a ti a. Government Lawngtlai College hmalakna chuan Lawngtlai mipuite rilruah nghawng thuk tak a neih a beisei tih a sawi.

‘Run For Health (Marathon)’-ah hian Government Lawngtlai College zirlai engemaw zat telin, Areopagy, Lawngtlai Bazar atanga BRTF Camp, College Veng Lawngtlai thleng an tlan a ni.

<><><>

2 MIZO YOUTHS AT WORLDSKILLS LYON 2024

Mizo thalai pahnih Emily VL Thakimi, Aizawl Khatla Veng leh Maximus Lalruatkima, Dawrpui Veng te chu khawvel pum huap thiam thila inelna, ‘WorldSkills Lyon 2024’-ah an tel dawn.

Mizo thalai pahnihte hi India ram aiawh 60 zingah telin nimin khan France an thleng a. WorldSkills 2024 hi Euroexpo Lyon, France ah tun thla ni 10 atanga ni 15 thleng neih tur a ni a. Khawvel ram hrang hrang 70 chuang aṅangin thiamthil hrang hranga intihsiaknaa tel tur mi 1400 chuang leh expert 1300 chuang bakah chhimitu mi eng emaw zat an pungkhawm dawn a ni.

Emily VL Thakimi leh Maximus Lalruatkima te hian kumin May ni 15 atanga ni 19 thlenga Delhi-a neih, IndiaSkills 2024 intihsiaknaa tel mi 900 zingah Gold Medal an lo la ve ve tawh a. Emily VL Thakimi hian Fashion Technology-ah Gold Medal Medal lain Maximus Lalruatkima hian Floristry-ah Gold Medal a la ve bawk a ni.

Emily VL Thakimi hi Women's Polytechnic, Aizawl atanga Garment Technology zir chhuak a ni a, Maximus Lalruatkima hi PUC- a Public Administration III Semester zirlai a ni.

<><><>

SERCHHIP – PRIVATE ATM

Mizorama mimal enkawl ATM hmasa ber Serchhip IOC Vengah nimin khan hawn a ni.

Mipui hnena ATM hlanna hun hi a enkawltu tur Pu PC Lalchhuanawma in-ah, neih a ni a, hetah hian ATM hawngtu. Serchhip Dist. MJA President Pu C.Lalhmingshluah chuan mipui mamawh tak mai ATM booth thar Mizorama Private enkawl hmasa ber Serchhipa hawn a ni chu a lawmawm a, Serchhip District tan hmasawna pawimawh tak a ni, a ti a. A neitute tan pawha hlawkna ni thei turin mipuiin tangkai takin hmang se a duh thu a sawi.

He ATM bun nana a hnarkaitu ber Pu S.Lalrinawmachuan ATM hawn a nih theih nana hma an lak chhoh dan a sawi a. Aizawl, Champhai, Lunglei leh Tlabungah te Vakrangee Kendra, ATM hi hawn tura buatsaih mek niin Mizoram chhungah 30 vel hawn theih an beisei thu a sawi a. India rama ATM tam tak, pawisa awm lohna a tam avanga RBI-in complaint a dawn avangin a buaipuitu tur company thlan a ni a. Rintlak tia thlan chhuah zingah Mumbaia hmunpui nei Vakrangee Kendra hi telin, Assam, Manipur leh Nagaland-ah an inbun tawh a, Meghalaya-ah bun leh tum mek a ni, a ti.

Vakrangee Kendra ATM booth hawnaah hian tualchhung chanchinbumi leh booth enkawltu leh neitute chhungkua leh thenrual tha te an tel a. Booth awmna veng hi IOC Oil pump leh Bawrhsap pisa awmna a nih avangin tangkai hle tura ngaih a ni a. Hawn a nih hma pawh hian ni tlemte chhungin Cheng Nuai 3 chuang hmeh chhuah a lo ni tawh a ni.

<><><>

PM

Prime Minister Narendra Modi-a'n nimin khan Paris Paralympics Medalist, Praveen Kumar-a leh Hokato Hotozhe Sema-a te telephone hmangin a bia a. Hokato Hotozhe Sema-a'n kum 40 mi ni tawh chung a Paralympics-a medal a lak theih nana a thawhrimna chu chhuanawm leh lawmawm a tih thu a sawi a. Prime Minister hian Praveen Kumar nen training an neih chhunga internet kaltlang a puihna an lak dan a sawipui bawk a, hei hian a hma a sawntir hle a ni, a ti.

<><><>